

# Powšitkowne WOZJEWJENJA

njedźelu, 21. januara 2018

## 75. posmjertniny zbóžneho martrarja Alojsa Andrickeho

Lětsa je 75 lět, zo počerpje kapłan Alojs Andricki w Dachawje martrarsku smjerć. Wopomnjenski dzeń zbóžneho martrarja je sobotu, 3. februara. Swjatočnu Božu mšu na tutym dnju změje Drježdžansko-Mišnjanski biskop Heinrich Timmerevers w 10 hodź. w farskej cyrkwi w Radworju. Kemšam přizamknje so zetkanje a přikus na zahrodže wokoło cyrkwy. Wšitcy wěriwi ze serbskich wosadow su wutrobnje přeprošeni. Parkowanišća steja před šulu a za sportowej halu k dispoziciji.

## Přednošk wo krejnych swědkach

Na předwječoru 75. posmjertnin zbóžneho kapłana Alojsa Andrickeho porěči prelat profesor dr. Helmut Moll z Kölna pjatk, 2. februara, w 19 hodź. w Drježdžanskim Domje katedrale (Schloßstraße 24) wo krejnych swědkach za Chrystusa w dobje nacionalsozializma, kotřiž su ze Sakskej zwjazani. Mjez druhim předstaji społnomócnjeny Němskeje biskopskeje konferency za martyrologij 20. lěstotka měšnikow Aloisa Scholzu, kotryž ma serbskich prjedownikow, dr. Bernharda Wenscha, kotryž bě w Kamjencu z kapłanom, a Karla Leisnera, kotrehož zbóžnoprajenje 1996 su mnozy Serbja w Berlinje sobu dožiwili, kaž tež wyšku Goppelskich nacaretskich sotrow, mać Augustinu, kotraž bu 8. meje 1945 wot ruskich wojakow morjena.

## Zhromadny dzeń za 1. a 2. lětnik

Dekanatne dušepastyrstwo přeprošuje džěci 1. a 2. lětnika wutoru, 13. februara, wot 9.00 do 15.00 hodź. pod temu „Póstnicy“ do Don Boskoweho domu we Worklecach. Zajimcy njech so prošu hač do pjatka, 2. februara, pod telefonowym čisłom (03 57 96) 8 87 07 abo přez mailku na worklecy-kise@gmx.de přizjewja. Za wudawki dnja zběra so wobdžělnski přinošk we wysokosći štyrjoch eurow.

## Zhromadny dzeń za 3. a 4. lětnik

Dekanatne dušepastyrstwo přeprošuje džěci 3. a 4. lětnika srjedu, 22. februara, wot 9.00 do 15.00 hodź. pod temu „Póstny čas a mój wopor?“ do Don Boskoweho domu we Worklecach. Zajimcy njech so prošu hač do pónđzele, 12. februara pod telefonowym čisłom (03 57 96) 8 87 07 abo přez mailku na worklecy-kise@gmx.de přizjewja. Za wudawki dnja zběra so wobdžělnski přinošk we wysokosći štyrjoch eurow.

## Wo boju přećiwo wobšudnistwu při žiwidłach

Rodženy Radworčan dr. Handrij Klimant přednošuje pónđzelu, 29. januara, w 19.30 hodź. w kafeteriji Domu swjateho Jana w Smječkecach k temje „Bój přećiwo wobšudnistwu při žiwidłach“. Dr. Klimant džěla w zwjazkowym zarjedže za škit přetřebowarjow a wěstoty žiwidłow w Berlinje.

## **Kak džěci aktiwnje zapřijeć**

Čestnohamtscy pomocnicy a dalši zajimcy ze serbskich wosadow su na přednošk pod heslom „Kak džěci za Boha zahorić?“ přeprošeni. Referent za džěćacu pastoralku Drježdžansko-Mišnjanskeho biskopstwa Stephan Schubert nawjaza wutoru, 20. měrca, na swój přednošk w nowembru a chce so na tutym wječoru mjez druhim prašenju wěnować, kak móhli so džěci aktiwnje do Božeje mšě zapřijeć. Započatk je w 19.30 hodž. w Don Boskowym domje we Worklecach.

## **Mandželske seminary**

Za pory, kotrež chcedža so přichodnje zmandželić, poskićuje Worklečanske dekanatne dušepastyrstwo młodžiny seminary k třom terminam. Tute wotměja so stajnje pjatk a sobotu, 23. a 24. februara, 23. a 24. měrca kaž tež 30. nowembra a 1. decembra. Pjatk traja wone wot 18 do 22 hodž., sobotu wot 9 do 17 hodž. Přizjewjenske formulary, kotrež su w cyrkwjach wupołžene a pod [www.posol.de](http://www.posol.de) wozjewjene, měli so wupjelnjene hač do srjedy, 31. januara, na scěhowacu adresu póslać: Dekanatne dušepastyrstwo za młodžinu, Młynski puć 4, 01920 Worklecy. Dalša móžnosć je, formular z mailku na [don.boskowy-dom@t-online.de](mailto:don.boskowy-dom@t-online.de) abo z faxom na čisło (03 57 96) 9 55 95 póslać.

## **Džědojo a wowki z wnučkami**

Na prózdninski tydžeń džědow a wowkow ze swojimi wnučkami přeprošuje Smochčanski Dom biskopa Bena wot pónđzele do pjatka, 19. do 23. februara. Lětuša tema rěka „Boža pisana stwórba“. Přizjewić móža so zajimcy pod telefonowym čisлом (035935) 22 316 abo z mailku pod [paedagogik@benno-haus.de](mailto:paedagogik@benno-haus.de).

## **Póstnička w Lejnje**

Chróšćanska wosada přeprošuje wšitkich doroscenyh na póstničku, kotraž wotměje so sobotu, 27. januara, w Lejnjskim hosćencu. Tema rěka „Džiwi zapad abo cowboy a Indian“. Štóz chce, smě zabawny wječor z programom wobohaćić.

## **Kruh židowstwa so zetka**

Lětuše přenje zarjadowanje džěloweho kruha „Zetkanje ze židowstwom“ wotměje so pónđzelu, 29. januara, w 19.30 hodž. w Smochčanskim Domje biskopa Bena. Tema wječorka rěka „Stawizny Israela w starozakonskej dobjě“.

## **Zymska akademija k temje „Pytaj pokoj!“**

Lětuša zymska akademija pod heslom „Pytaj pokoj!“ wotměje so wot srjedy do nje-džeze, 7. do 11. februara, w Smochčanskim Domje biskopa Bena. Při tym nawjaza so na heslo lětušeho 101. zjězda katolikow w Münsteru. Sto lět po skónčenju Přenjeje swětoweje wójny chcedža za přičinami namocy a wójny pytać, při tym bibliske pozicije a teologisku tradiciju rozmyslić a wo tym diskutować, kelko wójny je džensa za měr trjeba. Nimo přednoškow wjacorych referentow ma so štwórtk, 8. februara, w 19.30 hodž. na Budyskim krajnym sudnistwje džiwadłowa hra „Teror“ znowa předstajić. Informacije k tomu poda Dom biskopa Bena. Zdobom móža so zajimcy jeničce za džiwadłowe předstajenje kaž tež za zymsku akademiju pod telefonowym čisлом (03 59 35) 22 315 přizjewić. Zarjadowarjej stej Dom biskopa Bena a Katolska akademija Drježdžansko-Mišnjanskeho biskopstwa.

## **Chorownja přepróšuje na žohnowanske modlenje**

Kamjenska chorownja maltezew swjateho Jana poskićuje přichodnje žohnowanske modlenje za žony a muži, kotřiž přeja sej džěćo, za tych, kotřiž so na porod džěsća wjesela kaž tež staršim z nowonarodženymi.

Hladajo na to, zo njeje samozrozumliwe, zo móža wšitke pory džěći dóstać, rjekny Vincenc Böhmer, katolski dušepastyr w chorowni: „Móžemy Bohu swoje přeće za džěsćom a swoje nadźije za čas samodruhosće dowěrić a jemu swoje starosće na wutrobu kłasć.“ Nanow a maćerje, kotřiž su so hakle njedawno ze staršimi stali, chce wón ze žohnowanskim modlenjom podpěrać. Tajke za staršich, džěći a swójby přewjedže wón pjatk, 26. januara, w 16 hodź. w kapałce Kamjenskeje chorownje. Modlenje za muži a žony z přećom za džěsćom kaž tež za staršeju w času samodruhosće budže srjedu, 7. februara, we 18 hodź.

## **Džělowe městno w Smječkecach**

Dom swjateho Jana w Smječkecach pyta k 1. měrcj 2018 sobudžělaćerja z kwalifikaciju hladarja a kublarja zbrašenych (Heilerziehungspfleger) abo chorobnu sotru respektiwnje hladarja z wolu, wotpowědnu kwalifikaciju nachwatać. W Janskich kupjelach bydla, zastaruja a spěchuja so duchownje zbrašeni ludžo. Swoje pisomne požadanje njech pósćelu zajimowani na adresu: Christliches Sozialwerk, Janska kupjel 1, 01920 Worklecy.

## **Putniska jězba do Słowakskeje**

Serbska putniska jězba do mało znateje Słowakskeje přewjedže so lětsa wot srjedy, 4. julija, hač do póndžele, 9. julija, z Tereziju Kubašec a fararjom Geratom Wornarjom. Wobdžělnicy zeznaja lud a kraj pod Wysokimi Tatrami. Hotel změja w Levoči. Wottam wobdžěla so na putnikowanjomaj na Marijansku horu a do Litmanovy, wopytaja Prešov a Košice a móža so wot Tatrow wobkuzlać dać. Přizjewjenja přijimuje Šmitec wozydłownistwo w Radworju, telefonowe čisło (03 59 35) 28 60. Nadrobnosće k putniskej jězbje poda tež Baćoński farar Gerat Wornar.